

國家之大志深憂在于青年不讀好書是書第一等  
好書以惟我良友能讀誦能研究能任發善藏  
之久于孫子孫也  
江右庠生張敬題

卦氣集解序



自來治經學者有漢學宋學門戶之爭而於周易爲尤甚漢學家駁斥  
宋儒河洛先後天之圖以爲道家所傳非義文之作然舍圖象以釋易  
則易義不能明也况漢學家之卦氣消息納辰爻辰在在與先後天諸  
圖有關係乎卦氣之學傳自孟喜虞翻言消息鄭玄言爻辰皆不出卦  
氣範圍然近代之漢學家於消息於爻辰尙能道之至於卦氣除十二  
月辟卦之外設問卦氣何以起中孚中孚之後何以繼以復屯謙睽等  
卦則無有能知其所以然者是則漢學家之責猶有未盡者在也吾友  
黃君星若治易三十餘年兼綜漢宋不立門戶著有易學探原象說都  
數十萬言多獨到之處余於往歲爲之集資刊印經傳解一種既已行  
世矣一日余偶以卦氣之說質黃君黃君云卦氣圖之組織前人多未  
爲之說失傳數千年矣刻正從事研究必將有所發明也會沈君秩民

以其先尊人竹初先生所著周易解贈余等。其附卷中有卦氣圖自有一定之序之語。遂以叩沈君。沈君則云。稿已散佚。歸而窮搜。乃得竹初先生所著殘表四紙。以示黃君。黃君乃以此表爲鑰。深思冥索。廢寢忘餐。以求其所以然。忽一旦豁然悟得卦氣圖由貞辰圖而來。更取古代相傳貞辰三圖。重爲釐訂。至是而數千年失傳之學說。始由晦而明。不寧唯是。卦氣圖之組織既瞭。乃知消息納辰爻辰。皆可以卦氣說貫通之。荀虞鄭易學之源。出於孟喜。益可證信。是則黃君之不立門戶。更爲漢學家之功臣也。朕民讀黃君書。擊節歎賞。斥貲寄余。屬速付刊。既復得黃君膺白等之助。遂以殺青。書成。乃撮其始末而序之。癸酉夏日。蔣維喬竹莊甫序於因是齋。

### 卦氣集解序

先君子箸卦氣直解。未及梓印。而毀于兵禍。痛矣哉。去歲蔣君竹莊馳書以治易之難。莫卦氣若。前人箸述均失其本旨。屬搜集殘闕。以備後之學者有所取證。乃求之數月。僅得先君子改正乾鑿度卦軌及黃梨洲氏主歲卦表。張皋文氏六十四卦貞辰圖。并釐正乾鑿度貞辰進退之說。四者而已矣。以此告竹莊。而竹莊以黃君星若。遂於易更相示之。星若既得先君子遺稿。探蹟索隱。訂正貞辰圖。又本之以天人一貫。象數一源。原要序卦。定其卦次。而成此書。其始末具見蔣黃兩君序言中。無庸贅述者也。夫卦氣者。曆法之大本。詳載於易緯乾鑿度及稽覽圖二書中。世以爲出於孟喜京房者。非也。第漢之治易而知卦氣者。惟孟京兩氏猶能得其餘緒。故漢儒謂之習京氏易。又謂之六日七分之學。其推求之法。易緯中已明言之。四正之卦。四時也。每卦六爻。卽二十四

節氣也。十二辟卦。十二月也。每卦六爻。即七十二候也。六十卦用事。以六日七分計。即周天之數也。今辟卦學者。咸能解之。至公侯大夫卿四者。皆以爲無策可推。無緒可尋。殊不知在貞辰進退之中。並有以初元士二大夫三公四諸侯五爲天子六宗廟。卽以爲公辟侯大夫卿。是誤爻位爲卦氣。未能明易之例耳。蓋易廣矣大矣。稱名取類。如有典常。不能相混而爲一者也。星若此書。集卦氣之大成。若讀其書。更進而求卦軌入厄諸法。則律曆之用備矣。或曰。易緯之書。不著錄於漢書藝文志。姚首源氏古今僞書攷言之爲僞。其實否也。史記曆書。漢書律曆志。有推求之術。如史記小餘大餘閏。漢書統母閏法。統法元法會法之類。名目雖與易緯不同。而求得之數。推求之法。與易緯同。不過易緯於曆律之外。更進而言災異也。京房傳有分六十四卦更直日用事之說。後漢書方術傳有緯候之部。及張純郎顛樊英諸傳中。亦屢言之。是漢儒之於緯也。可謂重視矣。善夫張皋文氏之言曰。河洛之文大備。而七略不著錄。將以符命之學出於其

中冊 5 A

中在所禁祕耶。鄭康成氏。漢之大儒。博通古文。甄錄而爲之注。則緯之出聖門。而說經者之不可廢也。審矣。使學者能讀此書。則卦氣之真理自明。而以易緯爲治易之要籍。信不誣焉。癸酉夏日沈祖緜庶民識于吳門自得齋

卦氣集解自序

人世間事。往往有盡心盡力以爲之而不能成者。有時機一至。若或使之。若天瞞之。若有鬼神陰來相之。稍加思索之功。不終日而已能觀厥成者。此非前之拙而後之工也。學未博。察未審。心未公。時未至。數者未得。而事不能成矣。士之於學業也亦然。余生也晚。未嘗親炙於宗師碩學之門。幸蒙海內友人。不我遐棄。往往以所好之易學書。或老莊書見示。故平生所見之老莊書。約五六十種。而易學著述。或依經之疏注。或不列經文之筆記。或自成一家之專書。或獨闢蹊徑之術數。乃至十餘倍於老莊。韓退之謂非三代兩漢之書。不敢觀。余則融通之。而折衷於孔子。漢宋門戶之見。一去。便覺心地開朗。如撥雲霧而見青天。以三十餘年之光陰。付諸易學老莊。心氣以是和平。精神以是充快。於先天象天人象。後天象。序卦象。雜卦象。之爲象。象河圖洛書。著數之爲數。象太

極圖之爲是象是數之象。太極即無極之爲非象非數之象。粗能次第。犁然綱舉而目張。條分而縷析。迺引而伸之。觸類而長之。立爲種種之觀法。使之六通而四闢。自以爲可以貢獻於世矣。而獨於卦氣一圖。未曾窮源以竟委。是元炳學易之功。尙未可謂完成也。客歲沈君。跌民。以其先尊人竹初前輩所著之周易易解見贈。開卷讀之。見其附卷中有謂卦氣圖自有一定之序之說。以叩沈君。沈君則云。稿已散佚。歸而窮搜。得其先尊人之殘稿數紙。舉以見示。而余鑽研卦氣之心。乃怦然動矣。於是徧檢所錄前人之說。與竹初前輩所注明之主歲卦表參觀。有不能通暢之處。則冥心孤往。早夜以思。如對古人而索其所以組織中孚復屯謙睽等公辟侯大夫卿之次第然者。不數日間。悟得貞辰圖與卦氣圖組織於一時。且爲組織於一人。故求真辰則用卦氣。求卦氣又用貞辰。輾轉相求。不能彼此相離也。旣而又將所以如此輾轉相求而

渾成不得端倪者。攻而剖析之。條而詳列之。使之明白而不疑。可見時會一至。海內自有有心人爲之開其先。助其成。非苟而已也。讀吾書者。須以起首之總圖對末後處之問答。先行觀玩一番。然後再循序而探索之。方知古人易奇而法之說。非偶然矣。拙著周易經傳解。客歲旣賴陳藹士先生等十餘人。合助刊資。得以行世。此書復得黃膺白。沈跌民。蔣竹莊三先生。及舍親周君晉年。助資以刊行。兩書之圖象。皆張鼎元先生一手所繪。而此書之校對。則舍親楊君平苗力任之。烏乎。諸君於元炳之易著。可謂重視矣。附書於此。蓋所以答高誼於無窮也。癸酉長夏。無錫黃元炳星若甫自序於觀蝶樓。

弁言

本書之宗旨。在會通漢宋門戶之見。使之互相發明。以揭示古人學問同歸之真相。

漢代學易諸家。有消息。有旁通。有爻辰。有卦氣。凡此等等。不過就全圖中擇其一端而表示之。本書雖舉其卦氣一名爲解。實則以少攝多。而於漢代諸家所學無不賅備。

卦氣之學。全賴貞辰三圖。今更增一圖。使其精蘊發泄無遺。而貞辰卦氣兩圖。互相因依之用處。遂一一披露。

卦氣圖中層層見其組織之迹象。故易於明白。而最外一層六十卦之次第。如復次中孚屯次復等。除識其真原而爲之組織之人外。實至今無有人知。本書特將其次第之所以然。一一爲之講明。學人不閱此書。則已。苟能耐心詳閱。則無有不能了解者也。

前人談卦氣者。往往似是而實非。矜惜而不肯示其精要。設心愈鄙。故發明愈少。本書擇其稍有可取者錄之。其膚淺而粗率者。概不錄也。錢塘沈竹初前輩於卦氣學治之最深。本書中多採取其說。惜原稿失散。其哲嗣族民觀察所錄示者。僅一鱗一爪之殘稿而已。

古人治易。往往藏一特異之點。以發明此要點之出於天然。如先天之復姤。後天之兌。天人發用象之无妄與升。序卦之夬。雜卦之蠱。河圖之北中。凡此等處。人所難測。此卦氣圖中。亦有一卦。此卦明全象皆通。本書類別略分為八章。第八章設為問答。將六十卦之次第一一示其相次之意義。最為切要。其他如與序卦先後天等象相關之處。亦解答極明。可先取而玩味之。再觀全書。可愈覺親切。

黃元炳識

卦氣全圖引據

原注之中。多不明處。特附案語以解之。

外層六十四卦。其次序見易緯稽覽圖。其言云。甲子卦氣起中孚。六日

八十分之七。而從。

從得一卦。

四時卦十一辰餘而從。

四時卦者。謂四正卦。離震兌四時。方伯之卦也。十一辰餘者。七十二分。而從者。

得一之卦也。

坎常以冬至日始效。復生坎七日。

復卦各生坎七日。

消息及雜卦傳。

相去各如中孚。

消息六日七分。四時卦七十三分。

小過蒙益漸泰。

寅

需隨晉解大壯。

卯

蠱革夬。

辰

旅師比小畜乾。

巳

大有家人井咸姤。

午

鼎豐渙履遯。

未

恆節。

同人損否。

甲

巽萃大畜賁觀。

酉

歸妹无妄明夷困剝。

戌

艮既濟嗑嗑大。

過坤。

亥

未濟蹇頤中孚復。

子

屯謙睽升臨。

丑

坎六震八。

離七

兌九

已上

四卦者。四正卦。為四象。每歲十二月。每月五月。卦六日七分。每期三百

六十六日。每四分。

黃元炳曰。此稽覽圖文。為卦氣圖成象之本。甲子卦氣起中孚。十一月甲子朔夜半冬至。為曆元起中孚也。六日八十分之七。以每日為八十分計之。中孚得六日又七分也。而從。從此而下也。四時十一辰。春夏秋冬中之第十一月。為子。玄枵。虛也。而從。十二支辰。從子而下也。七十三分者。八十分少七分也。坎常以冬至日始效者。效用於中孚。而為鳴鶴之子也。斗建於

子。爲鶴之子。卽將來小過之飛鳥也。復生坎七日者。復卦生於坎。與臨觀等十二辟卦各七日。七乘十二爲八十四。去坎震離兌四分爲每日之八十分。而舉坎於復也。復又次中孚而居第七日也。消息卦卽十二辟卦。復下卦震。先天震四也。臨下卦兌。先天兌二也。泰下卦乾。先天乾一也。天地交而下上反。故大壯上卦震。先天震四也。夬上卦兌。先天兌二也。乾坤相對也。姤下卦巽。與震相薄也。遯下卦艮。與兌通氣也。否下卦坤。與乾定位也。觀以下內卦又爲坤矣。自大壯起至否。天在上也。自觀起至泰。地在下也。六子相摩盪於天地之間也。消息及雜卦傳各如中孚。謂七日來復。與雜卦傳自乾而至訟七八五十六卦。八卦七次。而大過以下至夬。既未爲一卦。至乾亦七卦。故曰各如中孚也。小過蒙以下。六十卦之次序。其所以然。則余於本書詳之矣。坎六震八離七兌九。則河圖外重之成數也。四正卦爲四象。指後天象也。每月五月之下月字。當作卦字也。三百六十六日。堯典謂春三百有六旬有六日。舉大數也。每四分。每日作八十分之四分之一也。融會貫通之。堯舜歷數在目前也。

### 卦氣集解目錄

序文

弁言

卦氣總圖 以配置未能停勻。故次於弁言之下。

卦氣全圖引據

總圖重數概說 一

一 先天變爲後天之四司令 一至四

二 十二月星次當值 四至七

三 十二辟卦值七十二候 七至十六

(一) 消息 七至八

(二) 納辰 八至十

(三) 爻辰 十至十一



(四) 卦變 十一至十四

(五) 七十二候 十四至十六

四 公辟侯大夫卿之次序 凡十七節。 十六至四十

五 五位次序之組織 四十至四十九

六 六日七分 四十九至五十二

七 卦氣與貞辰之相關 五十二至五十九

八 卦氣問答 五十九至七十一葉

卦氣集解

無錫黃元炳星若甫撰

全圖重數概說

卦氣總圖自內而外分八重。就其重數中所列者之性質言。可以分之為五種。震離兌坎一箇性質也。十一月子。亥。枵。女。虛。危。冬至大雪。如此等者。亦一箇性質也。復卦六爻以應。鵬且。不鳴。等六句。如此等者。亦一箇性質也。公起中孚。等等。則又一箇性質也。六日七分。亦一箇性質也。五者合於一。卦氣乃為易學中之一派矣。今一一詳列其性質之所以然之故。如下文。


一 先天變為後天之四司令

四司令。震離兌坎四箇三畫卦也。而在後天各為六畫卦。以統二十四氣。故四司令。卦三畫者。以觀變。六畫者。以觀統。

後天離坎者以先天象中四正卦代四正卦之乾坤者也兌震者以先天象中四隅卦代四正卦之坎離者也乾坤者以先天象中四正卦代四隅卦之艮巽者也艮巽者以先天象中四隅卦代四隅卦之震兌者也四正卦代四正卦則陰代陽陽代陰四隅卦代四正卦者亦然此先天變後天之大樞要也今後天象離南坎北舉四正陰陽之交其震東兌西則舉隅正陰陽之交也乾坤坎離先天四正正為天德之圓震兌艮巽先天四隅隅為地德之方離坎兌震後天四正正為天德之動艮巽乾坤後天四隅隅為地德之靜後天舉天則乾坤與艮巽四隅不用矣何也乾坤以交為用中乾坤相錯猶坎離相錯也顛倒不變者也震兌以交為用偏而震兌之綜猶艮巽之綜顛倒即變以為與其用陽之少者不如用陽之長者與其用陰之長者不如用陰之少者陰不用長卦

故巽如乾父坤母艮少男之同為不用焉此自然之扶陽抑陰而不可易之者也

先天後天合一圖



說明 坎兌皆竅也而相通其乾坤以坎離交而通之於兌在兌中者即乾坤之分身也又乾坤坎離先天四正也乾坎陽坤離陰陰陽相交而先後天之南北定是謂正正震坎陽離兌陰陰陽交也先後天之東西定是謂正隅東與南西與北之上下卦又各相交也乾艮陽坤巽陰陰上陽下而先後天之西南西北定是謂隅正震艮陽巽兌陰陰上陽下而先後天之東南東北定是謂隅隅隅隅隅正左右相交也正隅東西相交也中孚魚遊於下小過鳥飛於上離火則本乎天者親上坎水則本乎地者親下由是先後天合一而第一貞辰圖與四司令有大關係者乃訂定此亦可名先天變後天也見後貞辰圖甲

震統春是為木司令離統夏是為火司令兌統秋是為金司令坎統冬

是爲水司令。而或前。或後。之被司令者。皆土也。

易緯通卦驗八卦候二十四氣。法以分至四立。視晷影長短。與氣之所出而定吉凶。朱子發卦氣圖說。謂二十四氣七十二候。見於周公時訓。與夏小正月令相表裏。計每卦各四十五日。八卦共三百六十日。以應一歲之日。此其大略也。至其分卦。每卦皆以中爻爲主。後天乾在西北。中爻主立冬。坎在正北。中爻主冬至。艮在東北。中爻主立春。震在正東。中爻主春分。巽在東南。中爻主立夏。離在正南。中爻主夏至。坤在西南。中爻主立秋。兌在正西。中爻主秋分。若以坎中爻當冬至爲起。則坎末爻爲小寒。艮初爻爲大寒。艮中爻爲立春。艮末爻爲雨水。震初爻爲驚蟄。震中爻爲春分。震末爻爲清明。巽初爻爲穀雨。巽中爻爲立夏。巽末爻爲小滿。離初爻爲芒種。離中爻爲夏至。離末爻爲小暑。坤初爻爲大暑。坤中爻爲立秋。坤末爻爲處暑。兌初爻爲白露。兌中爻爲秋分。兌末

爻爲寒露。乾初爻爲霜降。乾中爻爲立冬。乾末爻爲小雪。坎初爻爲大雪。中爻再當冬至。而乾坎艮震巽離坤兌各三畫卦之後。天象周矣。此八卦二十四畫。以配二十四氣也。每氣得十五日。五日爲一候。則一氣三候。三爻一卦。共九候。八卦共七十二候。此於十二月卦。每卦六爻。以當七十二候外之又一法也。要之三爻卦。以坎中當冬至。六爻卦。以中孚當冬至。皆以卦體爲言。而攝於四司令者也。先天則以復爲冬至。合於孔子象傳。復卦云。先王以至日閉關。商旅不行。候不省方。觀下文十二月卦自知。茲以後天象依通卦驗作圖如下。

### 說明


每卦各四十五日。爲三氣之合。每氣十五日。俱以交節之時先後爲定。如正月初一日午時立春。則午時以前尙屬大寒是也。

觀此圖。可知震兌坎離可爲四司令。而艮巽坤乾爲四立節氣者。亦未嘗不可爲四司令也。

四司令卦用三畫卦。本當然。卦氣中用六畫卦者。就正而賅隅。就天而攝地也。四正天也。四隅地也。

天圓德。故無處不正。地方德。故大方無隅。

八卦兩四司令圖



四司令又名四監司。又名四監令。分主一年二十四氣。坎水監令也。初六冬至。十一月之中。九二小寒。十二月之節。六三大寒。十二月之中。六

四立春。正月之節。九五雨水。正月之中。上六驚蟄。二月之節。震木監令也。初九春分。二月之中。六二清明。三月之節。六三穀雨。三月之中。九四立夏。四月之節。六五小滿。四月之中。上六芒種。五月之節。離火監令也。初九夏至。五月之中。六二小暑。六月之節。九三大暑。六月之中。九四立秋。七月之節。六五處暑。七月之中。上九白露。八月之節。兌金監令也。初九秋分。八月之中。九二寒露。九月之節。六三霜降。九月之中。九四立冬。十月之節。九五小雪。十月之中。上六大雪。十一月之節。節者節氣也。中者中氣也。在月之首者為節氣。在月之中者為中氣。令者時令也。

二十二月星次當值

爾雅云。壽星角亢也。天根氐也。天駟房也。大辰房心尾也。大火謂之大辰。析木謂之津。箕斗之間。漢津也。星紀斗牽牛也。玄枵虛也。顓頊之虛。虛也。北陸。虛也。營室謂之定。娵訾之口。營室東壁也。降婁奎婁也。大梁

昴也。西陸昴也。濁謂之畢。珠謂之柳。柳。鶉火也。春秋內傳云。參爲晉星。實沈。參神也。鶉火之前。未爲鶉首。鶉火之後。已爲鶉尾。鶉首古時以爲秦之分野。張衡賦。昔者大帝說秦繆公而覲之。饗以鈞天廣樂。帝有醉焉。乃爲金策。錫用此土。而翦諸鶉首。春秋外傳云。二三子志之。歲在壽星及鶉尾。其有此土乎。實沈。鶉首。鶉尾。亦皆星次也。十二星次以皆從其所值之星而定其名。如爾雅等書所云。子。十一月也。爲玄枵。而值女虛危。丑。十二月也。爲星紀。而值斗牛。寅。正月也。爲析木。而值尾箕。卯。二月也。爲大火。而值氏房心。辰。三月也。爲壽星。而值角亢。巳。四月也。爲鶉尾。而值翼軫。午。五月也。爲鶉火。而值柳星張。未。六月也。爲鶉首。而值井鬼。申。七月也。爲實沈。而值觜參。酉。八月也。爲大梁。而值胃昴畢。戌。九月也。爲降婁。而值奎婁。亥。十月也。爲娵訾。而值室壁。地球繞日東行。宛若星辰西邁。故子爲玄枵。丑爲星紀等。十二宮與星次。斗牛女虛危室

等二十八宿座反行矣。蓋十二宮者。黃道全周均分爲十二段。每段一宮。卽子宮至亥宮也。黃道者。天球上之一大圈。爲一年內在地球上所見太陽經行之路。卽地球軌道之平面與天球相交之線也。與赤道面斜交。成二十三度二十七分之角。稱爲黃赤大距。而赤道者。地球面上距南北極各九十度之一大圈。廓而大之。卽爲天球上之赤道。黃道上之最卑點。在赤道南二十三度二十七分。太陽行至此點。則爲冬至。故名其點爲冬至點。其在赤道北二十三度二十七分者。謂之夏至點。卽黃道上最高之一點也。太陽循黃道由南而北。經過黃赤二道之交點。則爲春分點。由北而南。經過黃赤二道之交點。則爲秋分點。以春秋分點歲有所差。遂致宮與所值之星次相離。故今此玄枵虛等之說。名存而實亡。然研易而治卦氣者。要爲不可不知也。歲差者。謂黃赤道之交點。每年循黃道而向西退行之差也。其差爲五十秒零十分之二。須二

萬五千八百年繞黃道一周。有此交點春秋分之退行。是故子爲玄枵等所值之宿如爾雅等云云者難據矣。茲更以太玄所附漢曆證之。鶉尾初張十六度立秋。中翼十五度處暑。壽星初軫十二度白露。中角十度秋分。大火初氏五度寒露。中房五度霜降。析木初尾十度立冬。中箕七度小雪。大梁初胃七度穀雨。今日曰清明。中昴八度清明。今日曰穀雨。實沈初畢十二度立夏。中井初小滿。鶉首初井十六度芒種。中井三十一度夏至。鶉火初柳九度小暑。中張三度大暑。星紀初斗十二度大雪。中牽牛初度冬至。玄枵初婺女八度小寒。中危初度大寒。嫩管初危十六度立春。中營室十四度驚蟄。今日曰雨水。降婁初奎五度雨水。今日曰驚蟄。元炳案今日二字爲攝氏之今日也。中婁四度春分。太玄以三分其十二星次列之。又命名略異。如清明等。如以大梁等四者列於春分之次觀之。可知歲差之說自可信也。

太玄曆附云太初上元正月甲子朔旦冬至。无餘分。太初。漢武帝年號。上元者。遁甲上中下三元之

上元也。其年造曆。以建寅爲正月。是爲太初曆。

後千五百三十九歲甲辰朔旦冬至。无餘分。又千五

百三十九歲還甲子朔旦冬至。无餘分。十九歲爲一章。五百一十三歲爲一會。會者日月交會一終也。八十一章千五百三十九歲爲一統。從子至辰。自辰至申。自申至子。凡四千六百一十七歲爲一元。元有三統。統有三會。會有二十七章。九會而復元。一章閏分盡。一會月食盡。一統朔分盡。一元六甲盡。又云漢曆以八十一爲日法。一歲三百六十五日。以日法乘之。得二萬九千五百六十五分。益以四分日之一。之二十分少。下一之字。增。合二萬九千五百八十五分少。以二十四氣除之。每氣得一千二百三十二分。餘一十七分少。以三十二乘分。八乘少。通分內子。內字。納。爲五百五十二。又除之。得二十三秒。二十四除之。又二十八宿度數。角十二度。亢九度。氏十五度。房五度。心五度。尾十八度。箕十一度。東方七宿共得七十五度。斗二十六度。牛八度。女十二度。虛十度。危十七度。室十六

度壁九度。北方七宿共得九十八度。奎十六度。婁十二度。胃十四度。昂十一度。畢十六度。觜二度。參九度。西方七宿共得八十度。井三十三度。鬼四度。柳十五度。星七度。張十八度。翼十八度。軫十七度。南方七宿共得一百十二度。都為三百六十五度也。

邑先哲費松崖先生

名國暉。字瑞侯。清初順治年間人。

統天易說準刻漏。以每日百刻計。

而以一度作一百分。其二十八宿度。角十一度。亢九度。太氏十六度。少房五度。太心六度。尾十八度。箕十二度。半斗二十三度。牛六度。女十一度。虛九度。少危十六度。室十八度。壁九度。太奎十八度。婁十二度。太胃十五度。少昂十一度。畢十六度。半觜半度。參九度。半井三十度。少鬼二度。半柳十三度。半星七度。太張十七度。太翼二十度。少軫十八度。太太度七十五分。半度五十分。少度二十五分。二十八星度。共計三百六十五度四分度之一。即三百六十五度二十五分。亦即三百六十五日四

分日之一也。較太玄附曆為精矣。其每日百刻十二時。每時得八刻。合九十六刻。尚餘四刻。以一刻為納虛成閏之無極天根。以三刻作太極之卽三卽一觀之也。

女虛危於節令為冬至大雪。室壁於節令為小雪立冬。奎婁於節令為霜降寒露。胃昂畢於節令為秋分白露。觜參於節令為處暑立秋。井鬼於節令為大暑小暑。柳星張於節令為夏至芒種。翼軫於節令為小滿立夏。角亢於節令為穀雨清明。氏房星於節令為春分驚蟄。尾箕於節令為雨水立春。斗牛於節令為大寒小寒。此十一月起以至十二月止之節令所值之星次也。今以歲差而異。值說已見前。

### 三 十二辟卦值七十二候

乾坤各六爻之變。在漢代之孟喜虞翻。謂之消息。在京房謂之納辰。在鄭玄謂之爻辰。其在卦氣謂之十二辟卦。漢代焦贛虞翻。宋代李之才

朱元晦謂之卦變之自來。各有所本。蓋皆本諸先聖者也。

(一) 消息

清馬竹吾先生目耕帖云。春秋左傳孔穎達正義引伏羲十言之教曰。乾坤震巽坎離艮兌消息。案漢孟喜專論卦氣消息。虞翻宗之。此蓋孟虞所述。元炳案孔氏唐人尙多未佚之古書。而孟虞之述。蓋述古也。十言之教。既合於旁通。復合於卦變。而尤合於消息。如以先天象觀之。坤消則乾息。乾消則坤息。巽消則震息。震消則巽息。離消則坎息。坎消則離息。兌消則艮息。艮消則兌息也。如以孔子六畫而成卦之句觀之。則坤初爻變而下卦爲震。內外合成復卦。陽更息。則坤二爻又變。而下卦爲兌。內外合成臨卦。陽更息。則坤三爻又變。而下卦爲乾。內外合成泰卦。陽更息。則坤四爻又變。而上卦爲震。內外合成大壯卦。陽更息。則坤五爻又變。而上卦爲兌。內外合成夬卦。陽更息。而充滿。則爲純乾矣。於

是乾初消而爲姤。二消而爲遯。三消而爲否。四消而爲觀。五消而爲剝。全消而爲坤。如以孔子太極生兩儀。兩儀生四象。四象生八卦。與因而重之爻在其中矣。合觀之於先天大象中。是乾至姤數三十二卦。分全象爲兩儀。姤至遯數十六卦。分全象爲四象。遯至否數八卦。分全象爲八卦。否至觀數四卦。分全象爲十六。十六者八卦之兩儀也。觀至剝數二卦。分全象爲三十二。三十二者八卦之四象也。剝至坤數一卦。分全象爲六十四。六十四者八卦之八卦也。今卦氣圖中有此姤遯等十二月卦。坤卦所變之復隨泰大壯夬在其中。是明明有一先天大象在其間矣。意者揚雄作太玄重卦氣。而以八八六十四者爲九九八十一。太玄八十一首。遂使先天之學幾於中絕。而僅有此十二月卦耶。抑天地爲大物。乾坤一舉而可概其餘卦也耶。

卦爻之變。爲陽變陰。陰變陽。其變法有二種。一曰遞變。一曰疊變。遞變



者。先天之自生也。惟其然。故常在。疊變者。先天之生生也。惟其然。故曰新。乾之遞變。爲姤。同人。履。小畜。大有。夬。坤之遞變。爲復。師。謙。豫。比。剝。八卦所變。有重複者矣。此十二月卦。則乾坤兩卦之疊變也。

虞氏宗孟氏之消息。故後之治漢易者。主虞氏爲盛。然虞氏之說。包括極廣。即此乾坤二卦。外之諸卦。未嘗不有變卦等法。在內。十二月卦。可用於卦氣圖。亦其一也。學者或僅取其所言者。表章之。或更以宋前諸家之言。證確之。門戶之見深。不肯與宋代以後諸家通參。雖曰絜靜。精微。然吾正見其亂雜而無章也。

### (二) 納辰

納辰與爻辰。本同一法。但京房之納辰。以十二辰納之於十干中。十干亦可云十即出。莊子云。昔者十日並出。萬物皆照。是也。用之於納甲中也。鄭康成之爻辰。則以十二律相

生。同位娶妻。隔八生子爲據。而不論納甲。蓋一幹二枝。各有一箇條理。

而本未遂致殊異矣。

魏伯陽參同契云。三日出爲爽。震庚受西方。八日兌受丁。上弦平如繩。十五乾體就。盛滿甲東方。蟾蜍與兔魄。日月氣雙明。蟾蜍視卦節。兔者吐生光。七八道已迄。屈折低下降。十六轉受統。巽辛見平明。艮入於丙。南下弦二十三。坤乙三十日。東方喪其明。節盡相禪與。繼體復生龍。壬癸配甲乙。乾坤括始終。此即坤卦疊變初爻變。復下卦震。庚二爻變。臨下卦兌。丁三爻變。泰下卦變。乾甲乾卦疊變初爻變。姤下卦巽。辛二爻變。遯下卦艮。丙三爻變。否下卦變。坤乙之月象也。而乾之外卦變。爲觀。剝。坤之外卦變。爲大壯。夬。乾可知矣。而乾之甲壬相配。坤之丁癸相配。已括復臨泰大壯夬乾姤遯否觀剝坤十二月卦在其中。蓋以納辰爻辰陰陽爻相間列之。十二月卦氣陽與陽相連。陰與陰相連。各半而類列之。雖若不同。而其爲乾坤十二爻之作用則一也。茲更將京君明

之六爻納辰立表如下。

第一表 納辰表

乾宮 金	一 壬戌土 一 壬申金 一 壬午火 一 甲辰土 一 甲寅木 一 甲子水
坤宮 土	一 癸酉金 一 癸亥水 一 癸丑土 一 乙卯木 一 乙巳火 一 乙未土
坎宮 水	一 戊子水 一 戊戌土 一 戊申金 一 戊午火 一 戊辰土 一 戊寅木
離宮 火	一 己巳火 一 己未土 一 己酉金 一 己亥水 一 己丑土 一 己卯木
震宮 木	一 庚戌土 一 庚申金 一 庚午火 一 庚辰土 一 庚寅木 一 庚子水
巽宮 木	一 辛卯木 一 辛巳火 一 辛未土 一 辛酉金 一 辛亥水 一 辛丑土
艮宮 土	一 丙寅木 一 丙子水 一 丙戌土 一 丙申金 一 丙午火 一 丙辰土
兌宮 金	一 丁未土 一 丁酉金 一 丁亥水 一 丁丑土 一 丁卯木 一 丁巳火

右表中無乙丑甲戌乙亥癸未甲申乙酉壬辰癸巳甲午壬寅癸卯壬子十二干支。須知乾卦亦可作壬子壬寅壬辰甲午甲申甲

戌坤卦亦可作癸未癸巳癸卯乙丑乙亥乙酉也。卦之金木水火土依後天爻之金木水火土依支神。

歌曰：乾金甲子外壬午，子寅辰午申戌。坎水戊寅外戊申，寅辰午申戌子。艮土丙辰外丙戌，辰午申戌子寅。震木庚子外庚午，子寅辰午申戌。巽木辛丑外辛未，丑亥酉未巳卯。離火已卯外已酉，卯丑亥酉未巳。兌金丁巳外丁亥，巳卯丑亥酉未。又曰：乾金壬子外甲午，坤土癸未外乙丑。但此二句術家不用之。

六十干支既可以八卦之各六爻括之，而六十四卦中八卦之游魂歸魂卦，則游魂用四爻上之干支，歸魂用初爻上之干支。以其為八卦中某卦所變得故也。如晉為艮四爻丙戌，大有為巽初爻辛丑等等是也。